

समे – 12:25 hrs.

<><><><><><>

PM-Navy

प्रधानमंत्री नरेंद्र मोदी होरें अज्ज मुम्बई च 2 युद्ध पोतें ते इक पनडुब्बी गी भारती नौसेना दे बेड़े च शामिल कीता। इनें युद्धपोतें च आई.एन..एस-सूरत ते आई.एन.एस नीलगीरी शामिल न जिसले जे पनडुब्बी दा नां आईएनएस वाघशीर ऐ। इस मौके उनें आखेआ जे रक्षा विनिर्माण दे खेतर च भारत दे बंधदे कदम, होरनें मुख्यें पर स्थाई निर्भरता गी घट्ट करियै असेंगी मता आत्मनिर्भर बना करदे न। प्रधानमंत्री होरें भारत दी समुंद्री सुरक्षा च भारत दे तटरक्षक बलें दी भूमिका दी सराहना कीती। उनें आखेआ जे एह पहली बार ऐ जे त्रै पोत किट्ठे नौसेना दे बेड़े च शामिल कीते गे'न। एह रक्षा दे खेतर च भारतीय विनिर्माण ते समुंद्री सुरक्षा च कुल संसारी सतह दा नेतृत्व हासल करने दे भारत दे लक्ष्य आहली भेठा इक महत्वपूर्ण गैह ऐ। इस कार्यक्रम दे बाद प्रधानमंत्री होरें नवी मुम्बई दे खारघर च श्रीराधा मदनमोहन जी मंदर दा उद्घाटन करंगन जेदा निर्माण इसकाँन परियोजना तैहत 9 एकड दे इलाके च कीता गेदा ऐ। इस मंदर परिसर च इक वैदिक शिक्षा केंद्र, इक अजैबघर, आडीटोरियम ते आरोग्य केंद्र बनाना बी प्रस्ताव च ऐ।

<><><><><><>

Army Day Greetings

77मां थल सेना दिवस अज्ज समूलचे मुख्यै च बड़े मते उत्साह ते मानै दी भावना कन्नै मनाया जा करदा ऐ। इस मौके पर पुणे दे बाम्बे इंजीनियरिंग ग्रुप ग्राउंड च इक शानदार परेड दा सरिस्ता कीता गेदा ऐ जेदे च सेना प्रमुख जनरल उपेंद्र द्विवेदी मजूद रौहंगन जिसलै जे रखा मंत्री राजनाथ सिंह होर अज्ज शामी गौरवगाथा कार्यक्रम च शिरकत करंगन। राष्ट्रपति द्रौपदी मुर्मू होरें सेना दिवस दे मौके पर सैन्य कर्मिं ते साबका फौजिं गी शुभकामना दिंदे होई आखेआ जे स्हाड़े सैनिकें दी तरक्की खुशहाली लेई देसै च रमानदारी आहला माहौल बनाई रखने च मती महत्वै आहली भूमिका रौहंदी ऐ। प्रधानमंत्री नरेंद्र मोदी होरें देसै दे दलेर सैनिकें ते उन्दे परिवार आहलें गी बी शुभकामनां दितियां ते आखेआ जे सरकार कई चाल्ली दे सुधारें ते आधुनिकीकरण पर ध्यान दिंदे होई थेआरबंद बलें ते उन्दे परिवार आहलें दी भलाई बेहतरी लेई बचने बज्झी दी ऐ। उपराज्यपाल मनोज सिन्हा होरें बी सेना दिवस दे मौके पर शुभकामनां दिंदे होई आखेआ ऐ जे राष्ट्र अपने सैनिकें दी निस्वार्थ सेवा लेई सदा उन्दा कर्जदार ऐ।

<><><><><><>

Mahakumbh

प्रयागराज च दिव्य महाकुम्भ दा अज्ज त्रीया ध्याड़ा ऐ ते श्रद्धालु बड़ी मती ठंडू दे बावजूद बी मते उत्साह कन्नै त्रिवेणी संगम च आस्था दी चलोबी लाइयै गद-गद होआ करदे न। मकर संक्रांति दे मौके पर शड़ा कल गै कोई 3 करोड़ 50 लक्ख कोला मते श्रद्धालुं पवित्र स्नान

कीता। इलैक्ट्रानिक्स ते सूचना प्रौद्योगिकी मंत्रालय नै महाकुम्भ दे मौके पर लोकें दी सुविधा लेई संगठित भाषिणी राएं हर भाषा च जानकारी ते मदाद दी सुविधा देई रखदी दी ऐ।

<><><><><><>

Trains

महाकुम्भ 2025 दे सिलसिले च श्रद्धालुएं दी सुविधा लेई उत्तरी रेलवे नै श्री माता वैष्णो देवी कटड़ा ते प्रयागराज बश्कार 3 विशेष रेल गड्डियां चलाने दी घोषणा कीती ऐ। पैहली रेल गड्डी श्री माता वैष्णो देवी कटड़ा थवां 24 जनवरी गी बड्डलै सबेला 3 बज्जिए 52 मिंटे पर चलोग ते 25 जनवरी गी प्रयागरा थमां परतियै कटड़ा लेई वापस खाना होग। अगलियां दो रेल गड्डियां 7 फरवरी ते 14 फरवरी गी चलडन।

<><><><><><>

Badhal Deaths-CS

राजौरी जिले दे बडाल ग्रांs च इक अंजान बमारी कारण पिछले 24एं घंटे च दो होर लोकें दी मौत होई गई ऐ ते दिसंबर महीने थमां इस बमारी कारण मरने आहलें दी गिनतरी 14 होई गई ऐ। जंदे रोज जिंदी मौत होई उन्दे च 6 बरे दी कुड़ी सफीना कौसर ही जिसदी मौत जम्मू दे एस.एम.जी.एस अस्पताल च ते ओहदे गै रिश्तेदार मोहम्मद युसुफ दी मौत जीएमसी राजौरी च होई ऐ। चीफ सैक्रेटरी अटल डुल्लू होरें सेहत माहिरें ते राश्ट्रीय संस्थान दे अधिकारियें कन्नै मौतें दी जांच करने आस्तै इक बैठक लाई। अटल डुल्लू होरें सेहत ते पुलस मैहकमें गी आखेआ ऐ जे ओह इस अंजान बमारी दा पता लाने आस्तै तालमेल बनाइयै कम्म करन।

<><><><><><>

Children-Rescued

समाज च बच्चें गी शोषण थमां बचाने लेई इक विशेष अभियान तैहत जिला प्रशासन जम्मू नै नरवाल ते बाइपास इलाके थमां 6 बच्चें गी बचाया जिंदे कोला जबरदस्ती कम्म कराया जा रदा हा ते भिक्ख मंगार्ई जा'रदी ही। इनें बच्चें गी लोइचदियां ओपचारिकता पूरिया करने दे बाद उन्दी बाआबादकारी ते उनेंगी समाज दे होरनें बच्चें आंगर जीने गी यकीनी बनाने लेई बाल कल्याण कमेटी अग्गे पेश कीता गेआ।

<><><><><><>

NVD-Kishtwar

औंदी 25 जनवरी गी राष्ट्रीय मतदाता दिवस मनाने गितै तैयारिएं दा जायजा लैने ते नौजवानें अंदर वोट दे महत्व ते वोट पाने दी जिम्मेवारी बारै जागरूकता पैदा करने लेई किशतवाड़ दे उप जिला चुनां अधिकारी इदरीस लोन होरें इक बैठक लोआई जेदे च आयोजन बारै सोच-विचार कीता गेआ। मीटिंगा च दस्सेआ गेआ जे मतदाता दिवस दा आयोजन पूरे जिले च ग्राएं, स्कूलें ते जिला दफ्तर सतहें पर कीता जाग। इस दौरान मतदाताएं टकोहदा करियें किशोर ते युवा मतदाताएं गी वोट पाने लेई प्रेरित ते जागरूक कीता जाग। एहदे अलावा इस बारै ड्राइंग, सोआल, जवाब, सोशल मीडिया पर गतिविधियां, बैनर लिखने ते होई दिएं मकाबलेबाजियां बी कराइयां जाडन। एहदे अलावा डी.सी दफ्तर थमां इक बड्डी मतदाता जागरूकता रैली बी कड्डी जाग।

<><><><><><>

Weather-Highway

जम्मू-कश्मीर च 16 जनवरी यानि कल बड्डलै उच्चियें धारें दे बक्ख-बक्ख थाहरें पर हल्की बर्फबारी होने ते औने आहले दिनें च मौसम साफ ते खुशक रौहने दी मेद ऐ। मौसम विभाग नै 19 जनवरी तोड़ी मौसम विभाग ने 19 जनवरी तोड़ी मौसम च कोई बी खास हलचल नेई होने दी पेशगोई कीती ऐ। एहदे कन्नै गै जम्मू-श्रीनगर राश्ट्रीय जरनैली शिड़क पर गड़्डियें दी आओआई दौनें तरफा चलदी रौहग। सफर करने आहले गी सलाह दिती गेई ऐ जे ओह् अपनी-अपनी लेन च अनुशासन बनाइयै सफर करन पर राजौरी-पुंछ गी शोपियां कन्नै जोड़ने आहली ऐतिहासिक मुगल शिड़क अजें बी बर्फ जमा होने करी बंद ऐ।

<><><><><><>